



Brisel, 10.6.2026. godine
MEDIJIMA

SAOPĆENJE ZA MEDIJE

Održan deveti sastanak Pododbora za promet, energiju, okoliš i regionalni razvoj

Na devetom sastanku Pododbora za promet, energiju, okoliš i regionalni razvoj između Evropske unije i Bosne i Hercegovine, koji je održan 10. juna 2026. godine u Briselu, članovi dvije delegacije razmijenili su informacije o provođenju reformi i preuzimanju propisa EU u oblastima upravljanja vodama i upravljanja otpadom, kvalitete zraka, industrijskog zagađenja, zaštite prirode i biodiverziteta.

Evropska komisija je naglasila potrebu koordinisanog i harmonizovanog pristupa na nivou cijele države. Od bh. vlasti se očekuje da započnu provođenje cjelodržavne Strategije za usklađivanje okolišnog zakonodavstva BiH kao i usvajanje cjelodržavne strategije zaštite okoliša i akcionog plana koji trebaju biti usklađeni s pravnom stečevinom EU. Kako bi unaprijedila provedbu konvencija o zaštiti okoliša koje je BiH potpisala i kako bi osigurala sistematsko izvještavanje, potrebno je da BiH formalizira postupak imenovanja kontaktne tačke za BiH.

BiH aktivno učestvuje u aktivnostima Mehanizma Unije za civilnu zaštitu, te je potrebno što prije uvesti evropski broj za hitne slučajeve 112 i formirati Jedinicu za zaštitu i spašavanje na teritoriji cijele države.

U oblasti klimatskih promjena BiH treba usvojiti zakon o klimatskim promjenama na nivou države, kao i zakonodavstvo o sistemu za praćenje, izvještavanje, verifikaciju i akreditaciju, u skladu s obavezama prema Energetskoj zajednici. Potrebno je, također, usvojiti integrisani nacionalni energetska i klimatski plan, a delegacija BiH je informisala da je u toku izrada novog Nacionalno određenog doprinosa (NDC). Naglašeno je kako BiH treba povećati administrativne kapacitete u oblasti klimatskih akcija.

Delegacija BiH informisala je Komisiju o najnovijim dešavanjima u vezi s problemima cestovnih prevoznika i profesionalnih vozača iz BiH u EU te zatražila da se nastavi raditi na pronalasku jedinstvenog rješenja koje će važiti za sve države članice.

Na sastanku se razgovaralo i o ispunjavanju obaveza iz Ugovora o Transportnoj zajednici, usklađivanju bh. zakonodavstva s propisima EU, a od posebne važnosti u sektoru transporta je usvajanje ažurirane Okvirne strategije transporta BiH i Strategije o inteligentnim transportnim sistemima (ITS).

BiH treba poboljšati upravljanje sigurnošću cesta. Potrebno je osnovati vodeću agenciju za sigurnost na cestama i ostvariti napredak u pogledu izrade sveobuhvatne državne strategije

za sigurnost cesta. BiH treba u cijelosti uskladiti svoje propise o transportu opasnih roba s *acquis*-em EU i međunarodnim standardima.

Također, potrebne su daljnje reforme i modernizacija sektora željezničkog transporta, te usvajanje pravnog okvira i njegovog usklađivanja s pravnom stečevinom EU vezano za unutrašnje plovne puteve i pomorsku plovidbu. Komisija je primila k znanju napredak u pripremi Zakona o zrakoplovstvu.

Vezano za regionalnu politiku, od bh. vlasti se očekuje imenovanje državnog koordinatora za IPA III i izrada cjelodržavne strategije regionalnog razvoja.

Jedna od tema sastanka bila je i ispunjavanje obaveza iz Ugovora o Energetskoj zajednici, a Evropska komisija je pozvala na ubrzanje usvajanja Prijedloga zakona o regulatoru, prenosu i tržištu električne energije u BiH. Delegacija BiH je informisala Komisiju o najnovijim dešavanjima u vezi s izgradnjom skladišta radioaktivnog otpada na lokaciji Trgovska gora.

O Pododboru

Devetim sastankom Pododbora za promet, energiju, okoliš i regionalni razvoj u ime BiH kopredsjedavao je Mirza Hujic, pomoćnik ministra u Ministarstvu vanjske trgovine i ekonomskih odnosa BiH, a u ime EU Barbara Jesus-Gimeno iz Glavne uprave Evropske komisije za proširenje i istočno susjedstvo. Pododbor za promet, energiju, okoliš i regionalni razvoj je jedan od sedam pododbora, zajedničkih tijela BiH i EU, osnovanih u skladu sa Sporazumom o stabilizaciji i pridruživanju u svrhu praćenja i nadzora nad njegovim provođenjem. Više informacija o radu Pododbora dostupno je na stranici Direkcije za evropske integracije: <https://www.dei.gov.ba/bs/page-stabilization-agreement>.

Direkcija za evropske integracije